

Կ Ա Ր Ծ Ի Ք

ԱՍՏԴԻԿ ՄՈՎՍԻՍՅԱՆԻ «ՄԱՆԿԱՄԱՀԱՑՈՒԹՅԱՆ ՍՈՑԻԱԼ-ԺՈՂՈՎՐԴԱԳՐԱԿԱՆ ՀԻՄՆԱԽՆԴԻՐՆԵՐԸ ԵՎ ԻՐԱՎԻՃԱԿԻ ՎԻՃԱԿԱԳՐԱԿԱՆ ՎԵՐԼՈՒԾՈՒԹՅՈՒՆԸ (ՀՀ ՏՎՅԱԼՆԵՐՈՎ)» ԹԵՄԱՅՈՎ ԱՏԵՆԱԽՈՍՈՒԹՅԱՆ ՎԵՐԱԲԵՐՅԱԼ, ՆԵՐԿԱՅԱՑՎԱԾ Ը.00.03 <<ՖԻՆԱՆՍՆԵՐ, ՀԱՇՎԱՊԱՀԱԿԱՆ ՀԱՇՎԱՌՈՒՄ>> ՄԱՍՆԱԳԻՏՈՒԹՅԱՄԲ ՏՆՏԵՍԱԳԻՏՈՒԹՅԱՆ ԹԵԿՆԱԾՈՒԻ ԳԻՏԱԿԱՆ ԱՍՏԻՃԱՆԻ ՀԱՅՑՄԱՆ ՀԱՄԱՐ

Պետության կարևոր խնդիրներից մեկը բնակչության ժողովրդագրական բարենպաստ իրավիճակի ձևավորումն է, ինչը ենթադրում է այդ ուղղությամբ համալիր միջոցառումների մշակում ու իրականացում: Այդ միջոցառումներում, առաջին հերթին, պետք է բացահայտել մանկամահացության սոցիալ-ժողովրդագրական հիմնախնդիրները և հիմնական ջանքերը գործադրել դրանց լուծման ուղղությամբ: Այդպիսի մոտեցման կարևորությունը պայմանավորված է այն հանգամանքով, որ մանկամահացությունը բնակչության կենսամակարդակը, ինչպես նաև երկրի առողջապահական վիճակը բնութագրող կարևորագույն ցուցանիշ է, որն էական ազդեցություն ունի բնակչության բնականոն զարգացման վրա:

Մանկամահացության վրա ազդող սոցիալ-տնտեսական գործոնների համալիր ուսումնասիրությունը, առկա հիմնախնդիրների բացահայտումն ու դրանց լուծմանն ուղղված մոտեցումների մշակումը պետք է դառնա պետական քաղաքականության կարևոր ուղղություններից՝ հիմնված գիտական ուսումնասիրությունների ու հետազոտությունների վրա: Գրախոսվող աշխատանքում իրականացված հետազոտությունները նվիրված են այդ հիմնախնդիրների ուսումնասիրությանը և դրանց լուծմանն ուղղված նոր մոտեցումների մշակմանը, ինչով էլ պայմանավորված է ատենախոսության թեմայի **արդիականությունը և հրատապությունը:**

Ատենախոսության **կառուցվածքը** հնարավորություն է ընձեռել բացահայտել հետազոտվող հիմնահարցի բնութագրական կողմերը, ապահովել դրանցով

պայմանավորված խնդիրների լուծման հաջորդականությունը, պահպանել առաջարկված մոտեցումների գործնական նշանակության հիմնավորմանը և ամբողջական հետազոտության իրականացմանը հատուկ այլ սկզբունքները:

Աշխատանքի ներածական մասում ներկայացված է հետազոտության նպատակը և տրված են դրան հասնելու համար լուծման ենթակա խնդիրները, Այստեղ բնութագրված են տեսական ու մեթոդական այն հիմքերը, որոնց վրա կառուցված են հեղինակի մշակումներն ու եզրահանգումները:

Ատենախոսության **առաջին՝ «Մանկամահացության վիճակագրական ուսումնասիրության տեսական և մեթոդական հիմունքները»** գլխում ներկայացվել է տվյալ հիմնահարցի ուսումնասիրության պատմությունը, մանկամահացության ու դրա ածանցյալ ցուցանիշների վերլուծության մեթոդաբանությունը:

Աշխատանքի **երկրորդ՝ «Մանկամահացության ցուցանիշի ուսումնասիրությունը ժամանակի և տարածության մեջ ՀՀ տվյալներով»** գլխում իրականացվել է մանկամահացության ցուցանիշի վերլուծություն՝ ըստ սեռի և բնակավայրի:

Ատենախոսության **երրորդ՝ «Մանկամահացության վրա ազդող գործոնների վիճակագրական ուսումնասիրությունը ՀՀ տվյալներով»** գլխում վերլուծվել է ՀՀ 2010-2019թթ. մանկամահացության ցուցանիշի դինամիկան և կառուցվածքն ըստ մահվան հիմնական պատճառների:

Ատենախոսությունում իրականացված վերլուծությունները հիմնված են դիտարկվող բնագավառի դասականների, ինչպես նաև ժամանակակից հետազոտողների ուսումնասիրությունների վրա: Մեթոդաբանական և տեղեկատվական առումով աշխատանքում օգտագործված են պաշտոնական շրջանառության մեջ գտնվող նյութեր և տվյալներ: Այս հանգամանքը թույլ է տվել հեղինակին ապահովել աշխատանքում ստացված արդյունքների անհրաժեշտ **հիմնավորվածություն և հավաստիություն:**

Աշխատանքի **գիտական նորույթը** կայանում է նրանում, որ ՀՀ-ում մանկամահացության գործակցի վերլուծության արդյունքում բացահայտվել են մանկական մահերի վրա ազդող գործոնները և ըստ ՀՀ մարզերի վերլուծվել է դրանց առաջացման պատճառները, գնահատվել են այդ գործոնների ազդեցության սահմանները, հիմնավորվել է մանկամահացության և բացահայտված գործոնների միջև եղած փոխկապվածությունները:

Մեթոդաբանական և մեթոդական տեսանկյունից հետազոտության արդյունքներն ընձեռում են հնարավորություն կողմնորոշվել սոցիալ-ժողովրդագրական հիմնախնդիրների լուծման հարցում:

Ատենախոսության **գիտագործնական նշանակությունը** պայմանավորված է նրանով, որ ուսումնասիրության արդյունքները կարող են օգտագործվել մանկամահացության կրճատման և ժողովրդագրական վիճակի բարելավմանն ուղղված ծրագրերի իրականացման ընթացքում:

Ատենախոսության վերաբերյալ կան **դիպողություններ**, որոնք գրախոսվող աշխատանքի թեմայի շուրջ ուսումնասիրությունների շարունակման դեպքում, մեր կարծիքով, պետք է արժանանան հեղինակի ուշադրությանը: Դրանցից հատկապես անհրաժեշտ է նշել հետևյալները.

1. Ատենախոսությունում իրականացված վերլուծությունների արդյունքում հեղինակը ներկայացնում է մանկամահացության վրա ազդող հիմնական գործոնները: Միևնույն ժամանակ, դրանց ազդեցության, ինչպես նաև փոխկապվածության գնահատման ուղղությամբ վերլուծությունները աչքի չեն ընկնում բավարար խորությամբ: Այս համատեքստում, ցանկալի կլիներ, եթե առավել հանգամանալից անդրադարձ կատարվեր տնտեսական գործոնների ազդեցությանն ու դրանց դրսևորմանը:

2. Մանկամահացության հիմնախնդիրները, մեր կարծիքով, խորը կապվածություն ունեն սոցիալ-ժողովրդագրական զարգացումների և դրանց արդյունքում առաջացող իրավիճակի հետ: Հետևաբար, տվյալ հիմնահարցի վերաբերյալ ուսումնասիրությունը, մեր կարծիքով, հեղինակը պետք է

իրականացնել այդ համատեքստում՝ գնահատելով դրանց փոխադարձ կապվածությունն ու կախվածությունը:

3. Հանրապետությունում մանկամահացության ցուցանիշի վերլուծության արդյունքում հեղինակն ըստ մարզերի ներկայացնում է դրա դինամիկան: Կարևորելով նման վերլուծությունը, միաժամանակ, կարծում ենք, որ ատենախոսության գիտագործնական նշանակությունն ավելի կբարձրանար, եթե հեղինակը ներկայացներ մարզերի նաև սոցիալ-տնտեսական առանձնահատկությունները պայմանավորող գործոնները, որոնք, ի վերջո, անդրադառնում են նաև մանկամահացության վրա:

ԵԶՐԱԿԱՑՈՒԹՅՈՒՆ

Արված դիտողությունները չեն նսեմացնում հետազոտության արժանիքները: Դրանք հետապնդում են հանրապետությունում մանկամահացության սոցիալ-ժողովրդագրական հիմնախնդիրների լուծմանը նվիրված հետազոտության ուսումնասիրությունների արդյունավետության բարձրացման նպատակ:

Ա. Մովսիսյանի թեկնածուական ատենախոսությունն ունի որոշակի գիտագործնական նշանակություն, իրենից ներկայացնում է ինքնուրույն և ամբողջական հետազոտություն, որում դրված և լուծված են հանրապետության համար կարևոր ու արդիական խնդիրներ:

Հեղինակը հանդես է բերել մասնագիտական ու վերլուծական անհրաժեշտ մակարդակ, ինչի մասին են վկայում բուն ատենախոսությունը և դրանում ստացված արդյունքները: Աշխատանքում մշակված առաջարկությունները և կատարված եզրահանգումները կարող են օգտագործվել ժողովրդագրական խնդիրների լուծման ընթացքում:

